



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8

### North Korea nung ketdangsür 30 nem tasüba temerenshi agütsü

### Paris Paralympics: Khilari-i shot put asaya nung silver medal angu



VOL. XXI ISSUE NO. 323 (ADOK 323) DIMAPUR YANGTEPNÜ (THURSDAY) RONGJUI (SEPTEMBER) 05, 202 ₹ 5.00

## Pherima anentsüh lendong nung nisung 6 asü; Tesem asem nung NH 29 noktanga lir



**Dimapur, September 4, 2024 (TYO):** Chumoukedima district kübok Pherima nung Mongulbar aonung anentsüh tulu ka alua Dimapur-Kohima NH-29 anenbangogo. Iba lendong nung nisung 6 asü.

National Highway 29 nung Pherima, Tseipama aser Pagala Pahar tesemtem nung anentsüh alu aser iba ajanga lenmang

anenzüka bener ogo.

Iba lendong nung tasü mang 6 ngutetogo aser parnok rongnung Naga tsür ka dena lir. Tasürtemji Bijay, Sapon Biswas, Daju, Sonhie (60 F), Samir Dutta aser Khriesangulie (46 M) nunger ta jangjaogo.

Chumoukedima district kübok Pherima nung Mongulbar aonung anentsüh tulu ka alua

Dimapur-Kohima NH-29 anenbangogo. Iba lendong nung nisung 6 asüba osang angazüker.

State Disaster Response Force den tangartemi search & rescue operations inyakdar.

Pherima nung dang masü saka Piphema kübok Tseipama aser New Chumoukedima kübok Pagala Pahar nunga yasung anentsüh alu.

Anentsüh aluba sülen tesem asemprong nung khu abenba truck garitem anendena lir. Pherima aser Piphema nungbo azüklen nungi lung aser süngdong anenzüka aluba ajanga lenmang

noktanga lir. Anentsüh aluba tesemtem nung gari aika raksaogo.

Bodbarü Chief Minister Neiphu Rio-i Kohima nung senden ka ayonga NH-29 tensa osang lemsatepogo. CM Rio-i asür kibongtem den asüku lemsatepba metetdaksüogo.

Rescue operation atema SDRF personnel 15 mapa lemezüksü aser parnok den DDMA Chumoukedima, District Administration, DEF Chumoukedima, Traffic Police Chumoukedima, Village council, arogotem, lanurtem aser Pherima Village VDMA nungeri yaritep.

**Governor-i khuret abener**  
September 3, 2024 nü Kohima-Dimapur National Highway nung anentsüh aliba atema temulung raksar ta Nagaland Governor-i ashi.

Alima lendong ajanga teraksa jenti bentsür aruba ajanga asenok ajak dak kongshir. Talisa lendong

nung nisung takümtem samaba aser yiruba atema temulung raksar ta Governor-i ashi.

Iba lendong nung tasür kibongtem den asüku lemsateper aser tapayutsü takümtem samaba atema mangyimer ta paisha ashi.

Anentsüh ajanga takoksa bentsür aruba kibongtem asoshi bilemetsür aser state sorkari akokba tashi teyari agütsütsü asoshi mapa inyakdar ta Governor-isa metetdaksü.

Paisa yirua alirtem tekaratiba nung taneptsü angutsü moatsüba shisem.

Iba ama tensa ka nung Nagaland nung alir ajaki akokba tashi nungdakbapurtem yaritsü ayongzüker. District administration, police, government departments, local authorities aser volunteers-i anibelem arema yaritepba atema tenüngsang agütsür ta Governor-isa ashi.

## Kohima nung kanga petsaprongtep

**Kohima, September 4, 2024 (TYO):** Dimapur nungi Kohima tashi National Highway-29 noktanga sülen tanü Kohima nung alirtem kanga petsaprongtepa kechisarena lijayongtepogo.

Nisungtem jangotsü aser aonsotsü alitsü atema dokantem nung tarensena noktaktep aser külen fuel pumps nung garitem mesemi sentepa totzü enoktep.

Nübertemi taoksa nung lijayong masütsüla kechiyong Kohima District Administration-i kidanger district tem den yaritepa tanga lenmangtem ajanga Kohima-i nungdakba chiyungtsü, oset aser totzü bener arutsü ta Kohima DC Ramnikant-i ashi.

Külen, Kohima Chamber of Commerce & Industry (KCCI)-ia public dang talitabong lijaliyong masütsü meshiyogo.

"Iba ama tensa ka nung talila aliokba aser petsaprongtepba ajanga terata adokdaksür. Maneni shishilembartemia

talitabong ayoktsü tetuyuba agütsür" ta KCCI president, Kezhazer Angami aser general secretary Henry Chisüte nati ashi.

Kohima nung jangotsü aser tang nungdakbatem peria dang yua lir aser maneni angutsü, ta KCCI-isa ashi.

KCCI-isa dokan kiburtem aser shishilembartem dang jenjang tur mayoktsü metetdaksü aser aibelenertem merenshitsu ta parnokisa ashi.

Kohima DC-isa khu aser totzü abenba truck garitemi tsünglanglen agüja aliba lenmangtem ajanga senzütsü metetdaksüogo.

1. Jorhat-Mariani- Tsutapela Nagaland Gate- Tsurangkong-Longtho-Longnak- Changki-Chungtia- Mokokchung- VK-Wokha- Tseminyu- Kohima.

2. Merapani-Bhandari-Baghty-Sanis-Doyang Bridge-Wokha-Tseminyu- Kohima (upto 10 Tonnes only)

## Home Department-i "Travel Advisory" agütsür

**Dimapur, September 4, 2024 (TYO):** Kohima aser Dimapur tsüngda khu belentsü aser nisungtem senzusenbongtsü atema Home Department, General Administration Branch-i lenmang kar metetdaksüogo.

1. Dimapur len nungi aruba garitem 7th Mile NH 29 Sukhovi-Mhainamtsi-Jharnapani road ajanga senzüsü.

2. Gari tilatemi Showuba-Nuiland-Zhadima-NH 2 road

ajanga senzüsü.

3. Gari tilatemi New Chumoukedima nungi Old Chumoukedima (Old Check Gate) road nung senzüsü akok.

4. Dimapur nungi Tseminyu/Wokha/Mokokchung/Zunebhoti-i aoba garitemi Peducha nungi Tsiesema road ajanga senzüsü.

District Administration temi garitem senzüsü atema mapang telemsa ayutsü akok ta Home Department-i metetdaksü.

## Longsa Jn aser Dikhu bridge lenmang melapok

**Dimapur, September 4, 2024 (TYO):** Longsa Jn aser Dikhu bridge tsüngda NH 202 nung anentsüh aluba ano meyadokmaba ajanga September 6, 2024 tashi lenmang shibangtsü ta Tuensang Deputy Commissioner Lithrongla Tongpi Rutsa-i metetdaksüogo.

NH 202 nung (Chare-New Chungliyimti-Meyilong-Longsa-Sewak/ Mokokchung) lenmang shibanger anungji Trongar-Alisopur-Longmisa-Mokokchung mesüra Yangli/New Sangsomong-Yehemi-Suruhoto ajanga senzüsü metetdaksür ta Tuensang DC-isa ashi.

## Centre-i NSCN (K) Nikki den ceasefire atsülanger

**Dimapur, September 4, 2024 (TYO):** Union Ministry of Home Affairs (MHA)-i September 8, 2024 nungi tenzüka küm ka atema National Socialist Council of Nagaland (K) Nikki den ceasefire agreement atsülangogo.

Nagaland nung teti atema yimjung bener arutsü mapa inyakba nung shilem ka ama NSCN(K) Nikki den September 7, 2025 tashi ceasefire atsülanger ta MHA-i metetdaksü.

Bodbarü New Delhi nung sign sütepba ceasefire agreement ya maneni Ceasefire Ground Rules ajanga ketdangsütsü aser telok anaprongi repringshia CGR

inyakba nung shilem ka ama NSCN(K) Nikki den September 7, 2025 tashi ceasefire atsülanger ta MHA-i metetdaksü.

Bodbarü New Delhi nung sign sütepba ceasefire agreement ya maneni Ceasefire Ground Rules ajanga ketdangsütsü aser telok anaprongi repringshia CGR

yanglushitsu ta MHA-isa ashi.

NSCN (K) Nikki tenüng nung Ceasefire Supervisory Board (CFSB) Supervisor Abel Zingrü Thuer aser Secretary Ameka Achumi nati sign asü.

Külen, India sorkar tenüng nung Additional Secretary, Ministry of Home Affairs Piyush Goyal-i sign asü.

## Niuland aser Chiephobozou atema Help Desk Numbers metetdaksür

**Dimapur, September 4, 2024 (TYO):** Anentsüh ajanga Kohima-Dimapur NH-29 anenbangba ajanga Niuland nungi Ghotovi - Zhadima adena Kohima tashi lenmang lapoka lir ta Niuland DC-i metetdaksüogo.

Ajisüaka, lenmang kanga temesü den culverts tashimait kar aliba ajanga iba lenmang nung gari tulu mesenzükdaksür ta pai ashi.

Help desk numbers  
1. Vitoka Yephthomi, EAC Niuland : 7005469924  
2. Inahoto Sema, EE, PWD

(R&B) : 6009887733  
3. James Jami, ACP Niuland: 7085055012  
4. Kakheka Zhimomi, Chairman NTC : 7005492090  
5. Kahoto Jimomi, Hd GB Ghotovi village: 6009749025

Külen, Chiephobozou Addl. Deputy Commissioner-ia Zhadima (10th IR Camp) 10th Mile Junction (NH 2) -Niuland lenmang atema osang metetdaksüogo.

Iba lenmang nung gari tilatem dang senzüdaksür aser tsünglanglen agüja alirtem den tongteprateptsü akok ta ADC

Alemyapang Longchar, NCS-i sangdong ka nung ashi.

Assistance/Helpline (Contact Numbers):

1. Khriethozo EAC, Chiephobozou: 7005169225

2. Er. Semasie Katiry EE PWD (R&B) Chiephobozou Division: 8787712608

3. Kezevito Yhoshu ABSI, RO, 10th IR Bn Zhadima: 9612191591

4. Neilhousalie Miario Chairman, Village Council Phekerkriema: 9856189032

5. Neila-o Chairman, Village Council Zhadima: 6009229202

## NHIDCL dang ghonda 24 tsüngda NH-29 lapoktsü tuyuogo

**Dimapur, September 4, 2024 (TYO):** Chief Minister Neiphu Rio-i September 4, 2024 nü Deputy Chief Minister & National Highway Minister-in-charge aser ketdangsürtem den senden ka menogo.

Iba senden nung onük aika benoka lemsatep aser lemtet kar agia liasü aser tongtipang kaji NHIDCL dang ghonda 24 tsüngda NH-29 lapoktsü tetuyuba agütsüba lir.

Senden nungsa khu abenba truck garitem den gari tilatem dena senzüsü asoshi tanga lenmang ka bushiteptsü jembü.

Senden nung adenertemi NSDMA dang tasürtem aser yirua alirtem nem DDMA aser senotsü teyari agütsütsü tetuyuba agütsü.

Tarutsü nung iba ama lendong mataloktsü atema NHIDCL dang latest technology amshia mapa inyaktsü tetuyuba agütsü.

Dimapur aser Kohima tsüngda National Highway 29 ya Nagaland aser Manipur atema tongtipang lenmang ka lir anungji küm piyong timtem malitsüsa anepalutsüla ta senden nung adenertemi tetuyuba agütsü.

Pagala Pahar tesem paitoktsü

atema tsünglanglen agüja aliba lenmangtem amshitsu jembitep.

i. 7th Mile NH 29 Sukhovi-Mhainamtsi-Jharnapani (For both Light and Heavy Vehicles).

ii. Showuba-Nuiland-Zhadima-NH 2 (Light Vehicles only).

iii. New Chumoukedima to Old Chumoukedima (Old Check Gate) (Light Vehicles Only).

Dimapur aser Kohima tsüngda gari senzüsü atema PWD Department (R&B) ajanga Peducha nungi Tsiesema road dena temalen agüja aliba lenmangtem anepalutsü.



## Masterpeace Romania nung Imnainla-i shilem agi



**Dimapur, Rongjui/Sept. 04 (TYO):** Nagaland nungi nungtugu rock artist Imnainla Jamir - global ambassador, Masterpeace COOLeaders program - ya August 28 nungi September 2, 2024 anogtem Ploie?ti, Romania nung agiba Masterpeace Global Bootcamp nung shilem agitsü jaoka liasü. Iba bootcamp nungya continents pezü kübok linük 35 nungi nisung 120 dena liasü.

Imnainla-i iba bootcamp lapokdang Romania nung band "Chitara Prahovei" den külemi shilem agi aser la indang single

"Bloom" tema liasü. Sentong tatem nunga lai Romania, Colombia aser Netherlands nungi kentener tem den külemi shilem agia liasü.

Iba sentong nung shilem ka ama Imnainla-i temelenshi asoshi music aser sports amshiba lenmangtem nung ranglokba workshop tem nung dena liasü.

Global Peace atema linük 35 nungi züngsem 165 rongnung Imnainla ya India tenung nung shima lir.

"MasterPeace ya global grassroots peace network ka lir, koba alima nung linük 40 nung

kanga active lir aser tarutsü nung dangar dak metaloka malitsü aser tesunep nung alitsü atema inyaker. Ozü global ambassador Imnainla Jamir-i la indang sempet tajungtiba sayua Romania aser Colombia nungi kentener den külemi shilem agiba asoshi onok tejak tenteter," ta Masterpeace global nung Chief Changemaker Aart Bos-i ashi.

"Alima dang lungjemer yimjung lenmang sayutsüji music ya kanga tajung lir. Lungjemer yimjung lidaktsütsü ya takoktsü," ta ashi.

## GMS Lerie Chazou Kohima nung pre-Teachers' Day amung

**Dimapur, Rongjui/Sept. 04 (TYO):** Government Middle School, Leirie Chazou (Aradhura), Kohima nung Pre-Teachers' Day 2024 sentong school telungzük nung September 4, 2024 nü munga liasü.

Thejangulie Kirha, Head Teacher ajanga tayongzükba o jembidang tesayurtem anogomung amungba indang rateta ashi aser tesayur temi yaritepa aruba atema pelaba lemsatapa liasü.

Pai tesayurtem dang pei

mapa nung bendanga agütsüshi kaketshir aser school ajungtsü atema inyaktsü ayongzük.

Vice Chairman SMC, Megoviko Mor ajanga sentong nung tajungshi o jembidang, tesayur temi meranga inyakaka par mapa yari tushia mamshir ta ashi aser tesayur temi bendanga agütsür pei mapa inyakba atema tenüngsang agütsü aser kasaji inyaktsü ajungshia liasü.

Paisa kaketshirtem dang pei müketa aliba nungi yimya tajung

angazüktsü ayongzük aser tanü nenoki angazükba ajanga asung nenok jenjang alangzüktsü, ta ashi.

Iba sentong nung Class 7 nungi Ningmo menden liasü aser Class 8 nungi Wangying-i sarasadema sentong tenzük.

Class 7 nungi Lolam-i kaketshirtem tenung nung o tatsüka jemi aser Class 3 nungi Tonatoli-i tesayurtem asoshi sangro ka azüng aser Class 8 nungi Hamshen-i sentong tembanga sarasadem.

## NSACS ajanga City Barn centre tem lapoka lir: NBSE

**Dimapur, Rongjui/Sept. 03 (TYO):** Nagaland Board of School Education (NBSE) ajanga registered Heads of Institutions ajunga dang sangdong ka nung, Nagaland State AIDS Control Society (NSACS) ajanga Kohima, Dimapur, Wokha aser Tuensang nung CITY BARN (Catch Them Young - Be Aware, Reach on time, No to unsafe sex behaviour) - The Health Centre lapoka lir, ta metetdaksü.

Item health centre nung

arishi küm 24 tekübok lanurtem dak rangloker pei temang anema alitsü asoshi nungdakba osangtsüsang agütsütsü.

Item centre nungya Counseling Service/in-house Helpdesk facility/ access to Anonymous Q&A facility, linkages and referral amala services tem agütsütsü.

Kohima nung iba centre ya Tinpati, High School Road (7005493610) nung lir, Dimapur nung Super Market, Near ANTA Office (8731831316),

Wokha nung Tsumang Colony, Main Town (8730995989) aser Yuensang nung High School 'A' Ward, Below AkumImlong School, GHSS Road (7085633323) nung lir, ta sangdong ajanga ashi.

Iba dak sendakba nung Heads of Institutions temi iba osang ya tesayur aser kaketshir nem agüja physical aser mental health atema kaketshir temi teyari agiba nung yariteptsü ayongzük, ta sangdong ajangasa ashi.



Sangtemla Ward



Artang Ward

3rd September, 2024 nü tzunglu kanga sashia aser tanen makai aruba ajanga Mokokchung kübok ward ka nung anentsüh lendong ajanga takoksa ajuruba noksa nung angur. Yamaji Mokokchung tesem balala nung anentsüh agi lenmang anembangba aser takoksa ajuruba osang ajanga angazük. Mokokchung, 4th September, 2024

## JDU-i Teachers' Day tepela salem abener

**Dimapur, Rongjui/Sept. 04 (TYO):** Alima tesem ajunga nung Teachers' Day amungtsü renemtetba mapang bendanga agütsüba tesayur ajunga den tepela tesayurtem anogo salem lemsateper, ta JDU sangdong ka ajanga ashi.

"Tesayur temi putu ka yanglutetsü, yanglushitettsü aser raksatsütetsü, iba ama tashiji jara pezü telungzük nung tashi lir."

Aruya aliba putu asoshi pei

tekum bendanga agütsüba tesayurtem nem akhum agütsür aser parnok mapa ajanga tarutsü lokti yangertsü, ta ashi.

Mapa meranga inyakba temaitsü sempet anguba tesayur ajunga nem tenüngsang agütsür aser maneni tesayurtem dang pei mapa nung bendanga agütsür kaketshirtem anepaluba aser meimba nung pei tekolok shisatsü amshitsü ayongzük, ta JDU sangdong ajangasa ashi.

## DC Dimapur-i railway station semdang



**Dimapur, Rongjui/Sept. 04 (TYO):** Deputy Commissioner, Dimapur, Dr. Tinojongshi Chang, NCS ajanga Dimapur Police Commissionerate nungi lenirtem dener September 2, 2024 nü Dimapur railway station semdanga liasü.

Iba mapang parnoki security mera atema Railway Protection Force (RPF) den senden mena liasü.

Security tashi itshiba nung shilem ka ama railway station nungi adokba tesem asemprong nung police checkpoints amenoka liasü.

Item checkpoints ya 24/7 lapoka alitsü aser yangji aliba ketdangsur temi passenger arurtem ayak/identity jangjatsü.

Dimapur nung temzüng-ozüng shidak amshitsü aser nüburttem kumzuka ayutsü mechi iba mera ya agir.

## NSCN/GPRN Sumi Region-i bike ka nguteta lir

**Dimapur, Rongjui/Sept. 04 (TYO):** NSCN/GPRN-R (Akato) Sumi Region ajanga Apache bike (registration No. NLO7-7414, chasis No. MD634BE87P2B18892 aser Engine No. AE8BP2X18992) nguteta lir, ta GPRN/NSCN-R (Akato) sangdong ka ajanga ashi.

Tejangja kiburi nungdakba kuli kakettem bener arua Sumi region indang office nungi anogo tenet tsungta agizüktsü akok. Iba dak sendakba nung mobile number 8837259120 ajanga osangtsüsang tali tejangjaba metettsü akok, ta sangdong ajanga ashi.

## NBSE-i Financial Literacy Examination 2024 atema metetdaksür

**Dimapur, Rongjui/Sept. 04 (TYO):** Nagaland Board of School Education (NBSE) ajanga Class IX & X nung Financial Literacy course agütsüba school ajunga dang, Financial Literacy Examination 2024 ya school temi offline yimya nung September 20, 2024 anepdang 10:00 ako nungi anüngdang 12:00 ako tashi agitsü, ta metetdaksü.

Question Paper aser nungdakba examination materials ya Board ajanga agütsütsü. Kohima district atema school temi examination materials ya September 18, 2024 nü Board indang Office

nungi office mapang meshitsüla, ta sangdong ajanga ashi.

Danga district tem artema Question Paper aser examination materials ya Board ajanga shimteta aliba school tem tongtsütsü aser school temi September 18, 2024 nü meshitsü akok.

Question paper nungya Multiple Choice Questions (MCQ) tejang 100 alitsü aser tasüngdangba shia mark ka-ka alitsü, ta ashi.

Register sür course fee Board nem agütsür aliba kaketshirtem dang iba tatidang nung mentettsü, ta NBSE sangdong ajangasa ashi.



# PM Modi-i Brunei semdangba sülen Singapore tonga ogo



September 04, 2024 nü Brunei nung Ato kilonser, Narendra Modi-i Brunei nung Sultan, Hassanal Bolkiah den senden amendang tangokba noksa nung angur.

**New Delhi, Rongjui/September 04 (Agencies):** Ato kilonser Narendra Modi-i Brunei semdangba sülen Bodhbarnü Singapore tonga ogo; pai tang agi pongubenbuba Singapore semdang.

Singapore Ato kilonser, Lawrence Wong-i jaokba sülen Modi-i iba linük semdang.

Singapore atongba sülen Modi-i X ajanga, "Singapore tongogo. India-Singapore tesendaktep tajungba akümtsü atema senden aika amentsü imlar. India nung mapatongtem aser Yuva Shakti sempet ajanga asen linük ya investment atema tesem tajung ka kumdaktsür. Sobaliba tsütsüa tesendaktep tajungba akümtsü tebilemba lir," ta metetdaktsü.

Tamalen Ministry of External Affairs (MEA)-i

sangdong ka ajanga, "Lenirtemi India-Singapore Strategic Partnership asadangtsü aser linük anapronglai jangraba regional aser international onüktem nung tebilemba lemsateptsü," ta metetdakja liasü.

Singapore Ato kilonser Wong ajuruba dak alia Modi-i Senior Minister, Lee Hsien Loong aser Emeritus Senior Minister, Goh Chok Tong nata ajurutsü.

Modi-isa Singapore nung business lenirtem, linük anaprongla nungi interns, India nung India Ready Talent Programme ajanga intern agir Singapore nung kaketshirtem aser Singapore companies nung inyaker Odisha nungertema ajurutsü.

Ministry of external affairs otongdar, Randhir Jaiswal-i,

"Ato kilonser Narendra Modi Singapore tongogo. Airport nung Singapore Minister for Home Affairs & Law-i pa agizüka liasü aser hotel nung India nungertemi pa agizük. Asüngnep pai Singapore Ato kilonser den senden amentsü, iba sülen pai Singapore Tir aser Emeritus Senior Minister na densema tongti ketdangser aika den senden amentsü," ta metetdaktsü.

MEA otongdarisa, "Singapore semdangba ya kanga tongtibang, kechiyong iba ya Indo-Pacific nungi tenzüka India-Singapore rongsenkettzüng tesendaktep aser India-Singapore technology tesendaktep tajungba akümtsü. Item ajak ya linük anaprongla atema tongtibang," ta shisem.

# West Bengal assembly nung Anti-Rape Bill agizük

**Kolkata, September 04 (Agencies):** Bodhbarnü West Bengal state assembly nung state anti-rape Bill agizükogo; iba bill ya ruling party Trinamool Congress (TMC) aser Opposition nung züngsemtem ajaki melungtepa agizük.

Iba Bill kübok tashiyim amshia taküm raksatsüba nung aitsürtem aser parnoki takoksa angurji tepsetra mesüra taküm lemtatsüra tasüba temerenshi agütsütsü.

Iba Bill ya state Law Minister Moley Ghatak-i benoka liasü.

Ajisüaka Assembly-i iba bill nung Opposition lenir, Suwendu Adhikari-i iba bill nung onük ka inoksemtsü benokbabo magizük.

'Aparajita Woman and Child Bill (West Bengal Criminal Laws and Amendment) Bill 2024,' ta ajaba bill ji tetsür-tanurtem kümzüksü atema ozüng tesashiba akümtsü aser tashiyim amshia taküm raksatsüba ozüng tesashiba akümtsü nükjidong nung benok.

Tawa Kolkata nung aliba

RG Kar Medical College nung doctor tetsür ka tashiyim amshia raksatsüba sülen tepsetba anema linük tesem ajaklen longkak aitba sülen state sorkari ozüng tesashiba akümtsü atema iba bill benoka agizük.

Anti-Rape Bill kübok tashiyim amshia raksatsür tepsetra mesüra taküm lemtatsüra aibelenertem nem tasüba temerenshi agütsütsü aser tashiyim amshia raksatsüba nung aibelener mesüra teloki tashiyim amshia raksatsüba nung aibelenra taküm piyong tepoukdak ayutsü.

State sorkari state police force nungi special Aparajita Task Force ka tentetsü aser tashiyim amshia raksatsüba ken o benokba sülen anogo 21 tsüngda tashi nung bushisüngdangba maparen ajak tembangtsü.

Iba bill nükjidong ya, item ama ken otem tekeraba nung bushisüngdangtsü, tekeraba nung ochi obendang agütsütsü aser tekeraba nung aibelenertem nem temerenshi agütsütsü atema lir.



September 04, 2024 nü El Alamein International Airport nung Egypt International Airshow tetenzük sentong nung Indian Air Force team-i shilem agidang tangokba noksa nung angur.

# Chhattisgarh nung Maoists telungpur 9 khaset



September 04, 2024 nü Dantewada district nung security sepaitemi khasetba Maoists telungpurtem tasümang sorkar hospital kati bener arudang tangokba noksa nung angur. Bastar region nung sepaitemi Maoists telungpur 9 khaset.

**Raipur, Rongjui/September 04 (Agencies):** Chhattisgarh state kübok Bastar region nung security sepaitem aser Maoists telungpurtem tsüngda khatepdang telungpur 9 khasetogo, ta Bodhbarnü police-i metetdaktsü.

Mongolbarnü 10:30 ako meta Dantewada district headquarters nungi kilometer 50 shi pilar Loha yim anasa Purangel aser Andri arem nung sepaitem aser telungpurtem tsüngda aiben khatepa liasü, ta Dantewada district nung Superintendent of Police, Gaurav Rai-i metetdaktsü.

"Khatap tembangba sülen PLGA uniform agir tasümang 9

angu," ta paisa metetdaktsü. Hombarnü (September 2) Chhattisgarh kübok Bijapur district nung Maoists pongui surrender süogo aser parnok rongnung ana apuba mesüra tepsetba atemabo sen lakh kaka senpet agütsütsü sangdonger liasü, ta police-i metetdaktsü.

Police matsüngdangi arua surrender asürtem rongnung tetsür asem- Podiyam Budhri, Mallam Deva aser Kartam Hadma nung densema liasü.

"Mallam ya Golapalli Local Organisation Squad nung züngsem liasü aser Hadma ya Communist of India (Maoist) nung DAKMS Tir liasü. Tena apuba mesüra tepsetba

atemabo sen lakh kaka senpet agütsütsü sangdonger liasü. Podiyam ya Mehta RPC Krantikari Adivasi Mahila Sangathan (KAMS) nung züngsem liasü, ta police-isa metetdaktsü.

Taküm küm tenzüker tang tashi nung state nung sepaitemi tatalokba balala nung Maoists telungpur 130 dak tali khasetogo.

June ita nunga Chhattisgarh kübok Narayanpur district Maoists telungpur tenet khaset aser sepaitemi asem yirua liasü. May 23 nüa Narayanpur-Bijapur arrtsülen sepaitemi Maoists tenet khaset aser May 10 nü Bijapur district nung Maoists 12 khaseta liasü.

# Coast Guard Helicopter ka tsükokba lendong nung nisung 2 asü

**New Delhi, September 04 (Agencies):** Gujarat kübok Porbandar tzüyimkümlen Arabian Sea nung Indian Coast Guard indang helicopter ka tsükokba sülen tasümang anabo nguogo aser tang pilot tebushidak lir, ta ketdangsertemi metetdaktsü.

Advanced Light Helicopter (ALH) pilot, Commandant Vipin Babu aser diver, Karan Singh na tasümangbo Mongolbar aonung nguogo aser tanungba pilot, Rakesh Rana tang tebushidak, ta Coast Guard otongdar, Amit Uniyal-i metetdaktsü.

"ICG indang advanced light helicopter (ALH) nungji nisung pezü liasü aser diver Gautam Kumar bo lendong atalokba sülen kobi melii kümzük aser tanungba asem-pilot ka aser diver ana bushi tenzüka liasü. Mongolbar aonung pilot Vipin Babu aser diver Karan Singh na

tasümangbo ngutetogo," ta Amit Uniyal-isa metetdaktsü. Indian Coast Guard-i rong pezü den tayimtsü ka amshia pilot, Rakesh Rana bushidar. Lendong ajuruba tayimtsüjia nguogo, ta otongdarisa metetdaktsü.

Porbandar tzüyimkümlen Motor Tanker Hari Leela nung yirua aliba nisung ka kümzüksü atema Hombar aonung 11:00 ako meta Indian Coast Guard-i operation tenzüka tayimtsüji apusoa liasü.

Osang angazükba agi, Coast Guard ALH tayimtsü nungji nisung pezü mener teyimdak mapang tzüyimkümlen nungi nautical mile 30 shi pilar Arabian tzüyim nung tsükok. Tang tashi nung tayimtsü tsükokba kuliji mejangjar.

Iba tayimtsü lendong nungi kümzüksang Gautam Kumar tang hospital ka nung treatment tagidak lir, ta parnokisa metetdaktsü.





## TIR YIMYIM YIMOBILEM (EDITORIAL)

DIMAPUR YANHTEPNÜ, SEPTEMBER (RONGJUI) 05, 2024

### Benjong masü mangyimtsüla !

**A** tangji, Naga nungertemi jangraba benjong, kar yi yanglur, kar yi ayoker aser kar yi ajemer ta hopta ka ser ta Kisama nungbo anü adok aser anü alua memetet pelateptsüba benjong 'Hornbill Benjong' atongtsü anogo tukor-a majung 87 dang lir, anungji joko renemkonemtsü mapang atonger. Iba jagi yashi Chief minister-i anir par tongti purtem aika Kisamai ir Horn bill benjong asoshi nungdak jembir adokba nguogo. Ajisüaka, yashi ama anogo nungbo iba dang nungi noklangben agi terongdakba kangasa rongdak nungdaka arrsangokja inyaktsüba mapajibo Dimapur-Kohima lenmang nung anentsü tulu alua nisung trok tashi taküm samaba lendong timtem aser tensa tia ya tonga oa reprangdanga yariteptsüba mapa aser mapang ka liasü. Atangji, tzunglu tulu aruba yabo nisungi mesoitet aser tzunglu tulu aruba agi tzümetsungba aser anentsü aluba lendong timtem yaa ajungben atalokba lendong timtem lir. Iba jagiang, item ama ajungben lendong timtem atalokdang yariteptsü atema 'Disaster Management' asoshi nebo den senotsü balaka shiteta yur atar. Item senotsüji lendong matalokra mamshitsü saka ano talila nungdaktsüba lendong timtem atalokra ano government-i enoksemtsütsü ta tanga terenlok aser benjongbentsü sentong aika liaka, tang ama lendong tulu atalokba mapangbo, item ajakji toktsür lendong atalokba tesem tama atonger aser yangji asüama, yiruyipong aser timtem takoksa ajururtem nem teyari agüja yariteper. Ajisüaka, alemlir otsü nung, par Rom yimti arongba repranga Rom chuba Nerobo kongki tema par tongti purtem den pelatepba kazüa liasü ta jembiba amato, asenokbo külen Dimapur - Kohima lenmang anembanga anentsü aluba lendong nung nisung trok tashi taküm samar kinungertem maangyimteper, külen nisung aika garia raksa aser teyirua yiru ta ser anentsü majangtet timtemer, kar tzümetsung agi pei ki maka küma ponger orr jepteper ta aliba anogo mapang ka nung, aser nüboritem mangyimba aser jepteper olatemjia tangashia mangashi aser asüama lendong atalokbajia tangua mangu yutsür Hornbill benjongmung nung pelateptsübjiang bilema Kisama nungang pelatepa mongtepra, asenokji meimchir mulungjang adenba yimsüsür aser lenirtembo masütsü. Atangji, tang anentsü aser tzümetsung lendong agi nisungtem timtem takoksa ajuruba ya Dimapur-Kohima lenmang nung dang masü saka Nagaland ajaklen nebortem timtem ashidak maka lendong timtem aser takoksa tulu ajurudagi. Aji oda, tang Nagaland nung anentsü aser tzümetsung lendong agi nebortem timtem takoksa ajuruba ya tanga state ka nung atalok asübo, lendong atalokba osang angashili yimsüsürtem tonga oagi asüama ataloker kibongtem den yiruyipongertem aser kiojen aser gari raksartem ajurua parnok nem senotsü teyari sen lakh ishishibo agütsür lila. Ajisüaka, asen lima nungbo tanü ama meimlaba alima lendong agi nebortem timtem takoksa ajurudang, parnok mulung sünepja state government-i senotsü agi yariba osangbo mangashir. Atangji, nüboritem asoshi tajung inyaktsü kumtetba 'welfare government' ka atema teinyaktsü mapa tongtibangtibaji, benjong amongtsüba masü, nüboritem timtem tia nungi anitetsüba mapaji asütsüla. Kisama nung alima ajaklen nungi nisung tajung majung ajak jaoka benjongteptsü 'Hornbill benjong' ayongzüka yur, Kohima atongtsüba lenmang maka, light-a marur aser nüboritembo mangyim manener ta süra, iba tia nung Nero chuba ama asenoka pelatetsü asü? Asenok dak tashimait aika liaka, asenoka nisungbo nisung süra, ibai benjong asoshi bilemetsüba mapang masü saka mangyimertem den tejashi lemsateptsüba mapang aser asen lima lenmang aser kiojen raksa aliba den külemi asenok jakla, mulungsentsü aser taküm yimya yanglushitsüba mapang lir. Asenok japujarinüba aser rongsen penbuba jakla ya memelenshira, ashiko, asenoki Kohima dang masü saka Kisama-a dena metongtettsüba tensa mapang tamajungba ajurutsü.

## OLEMSABANG

### TAMANG SARASADEM NÜKTZÜ DENA KOKTETBA TONGPANG

~ Mar Pongener, Executive Secretary, ABAM

Tangatetba aser taginüba balala dak rangloker tatsütepba jendi liaka, tamang sarasadem aser nüktzü dena koktetba 'Yi Tongpang' aser Nagaland Liquor Total Prohibition (NLTP) Act 1989, magientsüla ta ABAMI akanga noktaker. Nagaland Sorkar Tatar Senden nung iba indang benoka jembiba dak sentakba nung tangatetbatem, kati ka aitsütepba, pei taginüba/maginüba olatem adoka sabang balala nung lemsatepba arudagi. Shisatsü balala anguba asoshia peladi saka zübazülema meshisadangi mejembitsü, takok asaa jembir ta asüdang kati ka meyirudaktsütsü aser tongtibangsa asen Tsüngrem mepelatsüsa asenoki meinyaktsü kanga kümdangtsüla. Koba mapa südir süaka, takok aser tamakok indang shisadanga jembitepbaji tim aser tamakoktem meteta tajungba yanglushir benshia aotsüji tongtipang. NLTP Act agizüker küm 34 dak tema arudang koba tashi takok aser tamakok ngua arur itemji Tsüngrem tsübuba shisatsü temerük dener shisadangtsüji tongtipang. NLTP Act 'revisit' asüba tetezü iba Act agientsü ta tangatetba nung masütsüla. Kechi ajanga tashi meiti kümdaktsür itemji bushiteta tashi taitba nung yanglushia bener aotsü tangatetba nung inyaktsüla. Tsüngrem akhümtsübuba aser teshisadanga makai Naga nungeri iba Act ya agientsü merangra ibaji Tsüngremer yimli anema asütsü. Alima tashi aser temetetba nem kokdaktsür Tsüngremer sentong anema inyakra aser jembira Naga nunger dang Tsüngremi mepelatsü aser Pa temoatsütem asenok nungi agienadokra koda tesusatsü asütsü? Yi Tongpang takok ngutetba ya Tsüngrem Tashi, Ain aser Sayatenya dena takok angu ta asenoki chichia meteta lir aser ibai mamai teti bilemtetsüla. 'Pa tesümgangtsü mapa pai inyakba, sayatenya pai inyakba, pai obendang kazüka yokba bilemtetang.' (1 Pu 16:12).

Naga lima rangben nung yi aser temesepba chiyungtsü talubosa jateta adokba ajanga kija, kibong, lokti aser arogotem süngjema melitetsüsa kümdaktsüba mapang ka ajurua aruba tatalokbatem asenoki meteta lir. Arogotemi ayonga 1960s nungi yi anema raratsü asalentong balala ayonga agia arubatem angur. Tesem ajaklen yi aser temesepba chiyungtsütem agi nüburtem timtemdaktsüba meteta arua ibai anema ola adoktsü tenzük. 'Liquor Prohibition Movement' Mokochung, ajanga Nagaland Governor dangi Nagaland nung Yi Ayokba dokantem shibangtsü aser Nagaland Dry State kümdakjang ta tezüluba nung lemsatepa arubatem lir. Ano arogo lenirtemi kesa taginüba takangba Government of Nagaland nung lenirtem dangi tezüluba nung agütsü. Nebu, rongsen, shisatsü, mapang endok mesasai tamangertemi ibai atema lümia sarasadema aru. Aseni mepiba Tsüngremi angashia Mokochung Dry District sangdongba aser Nagaland Dry State sangdongba ajak ya Tsüngremer tadenba lia atalokbatem ta asenoki jangja jangjaa metetsüla. Ya asayamenüa, tangatetba makai latak lataka inyaktsü mulungtetba mapa ka masü saka sarasadem nüktzü jendi endoka kangzükba takok ka ta ajaki angatetdi.

Nagaland tesem ajaklen yi dokan lapoka aoba, yi aser rongsen tashi agi tamangertem tanela tenük pokdaktsüba, yi jemer anogoshia rena aoba, yi aser temesepba chiyungtsütem ajanga rongsen jenjang ajema kümdaktsüba, ajaklen rara aser tetsükchitep agi süngdakja, yimjung aser tepela samadaktsüba, balaluyuba kibongtem tiemba tiemba küma tebilemetsü ajangzükba, kibong nung tepela samadaktsüba, senti taküm aika anojungi yi agi rongseta südaktsüba, kinük kisang ajaklen jabujari, nüktapangta aser ochimashiba mapatem jateta adokba, item amala tashi agi nüburtem timtemdaktsüba mapangtem asenoki amadoktsü makoker. Iba ama tia ka nung teimla ajak samar alidang asen lenirtemi nüburtem süngjema lidaktsütsü tangatetba nung iba tongpang ayonga raraa aru aser NLTP Act, 1989, agizük. Tanü iba Act meyipa reprangdang iba dak sentakba tamakoktema meteta arur saka tamakok tera aliba ajanga iba Act ya nungdak makaba ka ta angateta tamakok kisung indang jembira asenok shisatsü nung anünga aliba purtem asütsü. Tamakok kechi lir itemji meyipa repranger tajungba küma yanglushiba dak alaka iba Act magientsüla ta maneni nüburtemi ayimtentetsüla. Iba asoshi NBCC, Associations aser arogotem ajaki sarasadema mapatem inyaka arudagi. Iba temenen tashi den raratsü asoshi tali tasü aittsü aser tatem tashi raratsü tangatetba nung ABAM noktaka lir. Tsüngrem mepelatsüsa inyaktetba aser jembitetba purtem rongnung matentsü kanga kümdangdaktsüner. Akokba lenmangtem ajak nung ABAMI iba Act magientsü asoshi bendanga agüja tapet mapatem inyaktsü renema lir aser iba tangatetba nung Tsüngrem chirtem ajak atentsü ta sarasademer. Tsüngremer temoatsütem magishiba purtem rongnung matentsü kanga shisa kaa sarasadema alitsü aser iba tongpang anema nokdaktsü sarasadema alitsü ajungshir. Kibuba amadokba anema tekümdangtsü indang ashiba tanüa asenok asoshi ya kanga tongtipang ta metetdi: "Nai Kibuba ne Tsüngrem amar tangar tsüngremtem sülen jajara aser parnok tenzük aser külemra, atangji nenok samatsü ta tanü ni nenok anema küli agütsür (Taz 8:19).

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## Lebanon nung Help The Persecuted teloki Khristan tem yarir



Khristan melungtet telok Help The Persecuted (HTP) indang Seeds of Hope ministry-i Lebanon nung refugees nem chiyungtsü anganüa agütsüdang tangokba noksa nung angur.

**September 04, 2024:** Tang Israel aser Iran na tsüngda rara ajanga Middle East tesem ajaklen tensa tamajungba akümtsüsa tensa ka nung lia Lebanon nunga Iran-i pusemba Hezbollah aser Israel na tsüngda rara tenzüka missile amshi tenzüko.

Iba ama tensa ka nung Lebanon nung jenoka alir Khristan refugees aika taküm lendong nung lir.

Tanga linük balala nung reshikangshiba ajanga tejenokdak bushir Khristan Lebanon-i jenokdaksür, ibayongji Khristan ministry Help The Persecuted (HTP)-i Khristan nem tanela chiyungtsü agütsüba den külemi teyari balala agütsür.

Tang Lebanon nunga tensa tamajungba akümtsüsa aliba tensa ka nung HTP-i asentenshir maneni Khristan yaritsü atema renemer.

Help The Persecuted (HTP) nung Field minister, Amin-i, "Nüburtemi asüng kechi ataloktsüar memetet.

Parnok anogo shia terata nung alir. Atangji parnok ket nung kecha mali. Rongsen mali, yimjung mali, mesüra kecha mali. Parnok tejashi nung alir. Yisu Khristai dang lenla ajak nung temelenshi bener arutsütsü. Asenoki Pa nüngdaker. Yisu dak alaka shingaiia iba tensa memelenshitsu, ta metetdaksü.

HTP-i maneni Yisu teka aser tetsüngji parnok mission südaktsütsü nükjidong nung inyaker. Parnoki ministry balala ajanga timtemertem kümzüker aser taküm asentenshitsu.

Hopta shia parnok indang Seeds of Hope farm nungi chiyungtsü truck aika nung bener oa Khristan aser timtemertem nem agütsür aser parnok indang War Refuge Centre nung jenokdaksür.

"Onok mapa anasü agi tali kümogo, kechiyong southern Lebanon nungi nisung aika arur," ta HTP nungsa field minister Leila-i metetdaksü.

Leila-i, "Onoki ita shia Emergency Relief Kits lemstsür- iba nungji ita ka

piyong atema chiyungtsü takong aser mozü densema lir. Onoki reshikangshiba ajangshiba Khristan Safe Houses nung jenokdaksür. Onoki maneni inyaker aser akoba lenmang balala agi nüburtet tenzütsü renema dang lir," ta metetdaksü.

HTP-isa tanela chiyungtsü-a agütsür. Item sentongtem nung nisung 1,200 shi adenshia Middle East nung yimjung atema sarasadem aser Tsüngrem külemer, ta laisa metetdaksü.

Help The Persecuted CEO, Joshua Youssef-i alima tesem ajaklen Khristan dang sarasademjang, ta mepishiogo.

Joshua-i, "Iba rara ya tuluba kümra, ta ni shisabulur. Ajisüaka onoki reshikangshiba ajangshiba Khristan aser Lebanon nung teyari nüngdakerter maneni yaritsü melungtetogo," ta metetdaksü.

"Onoki alima tesem balala nung Arogotem dang iba region atema aser field ministers atema sarasademjang ta mepishir," ta paisa ayongzük.

## Nicaragua linük nung Nicaraguan Evangelical Alliance-a nokdangogo

**September 04, 2024:** Nicaragua linük nung sorkari maneni Arogo, Khristan organizations aser Khristan lenirtem anema inyakba mapang nung tang tesüsa sorkari Nicaraguan Evangelical Alliance (NEA)-a anentsüogo.

August ita nunga Nicaragua sorkari organizations 1,651 anenja liasü aser September ita tenzüka sülen tesüiba anogo ishika tsüngda organisations 169 anentsüogo.

Christian Solidarity Worldwide (CSW)-i ashiba agi, tang tesüsa Protestant Arogo 10 dak tali aser Latino-Islamic Cultural Association anentsüogo.

2018 küm nungi tenzüka tang tashi nung sorkari organisation ajak senteper 5,552 anentsüogo aser item organizations tiembaka Arogo indang mesüra Arogo den affiliate süa aliba

organizations lir. Organizations tulu rongnung Episcopal Church of Nicaragua aser Moravian Church of Nicaragua na densema lir.

CSW nung advocacy tongti, Anna Lee Stangl-i, tang tesüsa Arogo aika anentsüba ajanga züngsemtem adenshia tekülem sentong agitsü atema tesem makai kümogo, ta metetdaksü.

Stangl-i talisa Arogoi ketdangsuba schools aser hospitals nung amonger tanurtem atema teblemstsü katsür, ta ashi.

"Sorkari anentsüba associations teimbakati loktiliba nung kanga tongtibang shilem agir. Nüburtet taküm jenjang ajungkettsütsü atema taküm bendanga agüja tenzükerter atema onoki teblemstsü katsür. Sorkari parnok taküm alitsü atema dang bilemer," ta Stangl-

i ashi.

Laisa, alima linüktemi Nicaragua sorkar aitsütsü tetemtsü, ta ashi.

"Nicaragua sorkari maneni independent civil society organisation 169 anentsüba atema CSW-i maneni sorkar aitsür. Onoki alima linüktem danga Nicaragua sorkar aitsütsü ayongzüker," ta laisa metetdaksü.

Linük yimtiba nung 1917 küm tentetba First Baptist Church of Managua-a sorkari anentsüogo. Iba Arogoi seminary ka, hospital ka, radio station ka aser Khristan school aika lapoka lir.

Iba dak alia Shalom First Presbyterian Church of Nicaragua, Gospel Eternal Message of the Three Angels Adventist Church aser Christian Reformed Church of Nicaragua-a anentsüogo.

## ANOGO ABEN TSÜNGREM DEN

### Tsüngremi Kechi Nungloktsü

"Nisung kati kecha masüdang, pa langka lir ta bilernra, pai peisasa külakoktsür" (Gal. 6:3)

Satani alima nung pa mapa külakoktsüba ajanga renlokda tsür. Asenok makaba kar ta bilemba jagi peisasa külakokda tsür. Asenoksasa kanga ulua mebilemstsü ashir, "Saka Tsüngrem taochi agi ni kechi lir aji lir, aser pai kü nem agütsüba taochi amajok mangu" (I Kor. 15:10).

Ne taküm, ne sempet (talent & gift) nai aa aruba masü, itemji Tsüngrem taochi lir. Tsüngremi kechi agütsü aji ne meyong ta kodanga teblem, iba melen Tsüngrem sentsüwangshi asoshi langka inyaktetba atema pelaang.

Ano kodang asenoki peisasa ni shisa taka ta bilemdir, külakoktsür (I Kor. 3: 18,19). Tsüngrem jungkai adokba makai shisataka ta bilembaji tekolok shisatsü tematiba tekülakoktsüba lir. "Parnok shisa taka ta bilema tamachi aküm" (Rom 1 :22). Alima Tsüngrem den kasa ama ken ken asenoki bilemer, saka asenok pa asoshi tapet masü. Kodangsa asenoki asen kisüng agi satan akoktsü ta bilemer, pa tekülak tasa nung apur rongnung asenok tongti akümer.

Ajisüaka, satanji Tsüngrem asoshi tapet masü. Asen tangatetba nendaka alitsü menüngdak, saka asen lenmang nung Khrista metetba amshiang (A. Shin 3:5,6; I Kor. 2: 16). Temaba nungi jungkai adokba ajanga asenoki Satan madak takok angur. Ajak metetsang Tsüngremi satan akoker.

## Sudan nung Civil War ajanga Khristanem kanga timtemdar

**September 04, 2024:** Sudan Ato kilonser tasenba Abdalla nung Sudanese Armed Forces Hamdok-i linük nung yimjung alitsü aser yimsü balala Forces (RSF) sepaitem amangertem tsüngda tsüngda rara nung nisung taremzüktep alitsü nangzüka meyirjang aika süogo aser million aika jenshiogo; iba rara manenba ajanga Khristanem kanga timtemdar, ta Department of State-ia International Christian Concern (ICC)-i metetdaksü.

Yaküm April ita nung SAF aser RSF tsüngda rara tenzüka sülen nisung million 8 shi jenshiogo aser item rongnung Khristanem aika densema lir.

Sudan nung nütsüng shilem 5 Khristanem lir aser nütsüng shilem 91 Sunni Muslim nungertem lir. Sudan nung yimsü temeden jenjang kanga majung. Sudan nung taoba mapang dictator Omar al-Bashir aser pai benokba Sharia ozüng ajanga küm 30 tashi linük nung Khristanem kanga reshikangshia liasü.

2019 küm sepaitemi Bashir yimsüsüba menden nungi atsüngdokba ajanga Khristanem atema tensa tajungba akümtsü, ta bilem. Iba sülen Bashir-i benokba Sharia ozüngtem agien aser

Hamdok-i linük nung yimjung alitsü aser yimsü balala amangertem tsüngda taremzüktep alitsü nangzüka liasü aser linük nung yimsü temeden jenjang tajungba akümer ta züngshia U.S. Department of State-ia Countries of Particular Concern (CCP) nungi Sudan agiena liasü.

Item tenangzükbatem liaka linük nung yimsü temeden jenjang tajungba maküm.

Tahir Institute for Middle East Policy-i ashiba agi, "Muslim yimsü toktsür Khristan yimsü agizükertem anema ken o akar aser maneni reshikangshir."

2021 küm SAF aser RSF sepaitem senteper Hamdok-i aniba sorkar atsüngdok saka yaküm SAF aser RSF na tsüngda mangatettep adoka civil tenzüka liasü, ibaji ajanga Khristanem dang masü saka Muslim nungertema aika timtemdar.

Yaküm civil war tenzüka sülen Tenla ki 165 shibangtsüogo aser Tenla ki karbo sepaitemi military operations atema amshidar.



**AO OSHI ANGAZÜKDAK:****TANÜ ANGAZÜKTSÜBA OJANG**

Tir Yimyim

**Tamen**

(adj) süngjang mesüra chiyongtsü tachitsü shitak akümba (ripen, cooked)

· Aon tamen den külemi kidangeri somomo tamen bener arutsü

**Tamenakshi**

(n) terongdong, teka agi matong manashidak ( backside of the body below shoulder)

\* Tamenakshi dak anakshitsü atema pai teti süng tilaka ayur.

**OLONG PAITEP # 6915**

1				2				3		4
5		6								
							7			
8										
										9
		10					11			
				12				13		
14										
							15			
16										

**TIPLIN**

2. Auonung chiyongtsü asenba  
5. Mangyimba mapang  
7. O tamendakdak  
8. Peidak malangba  
10. Juli  
12. Sen ayudak  
14. Tenük agi ajitet  
15. Tamajung aküm  
16. Apuso

**LANGTSÜNGLEN**

1. Lenmang  
2. Aor kidong ka tenüing  
3. Tenarong maten  
4. A \_\_\_ g  
6. Mopung apodoka  
ola adokdaksüba  
9. Tongtipang tagitsü  
10. Menungra bilem  
11. Aiür  
13. S \_\_\_ k  
14. T \_\_\_ r

**OLONG PAITEP # 6914 TELANGZÜBA****TIPLIN :**

1. Yiar, 3. Tesola, 7. Yimra,  
8. Tangar, 9. Peria, 10. Tanur,  
11. Tasen, 13. Lemjem,  
15. Tambu, 16. Khuret,  
17. Sang.

**LANGTSÜNGLEN :**

1. Yimti, 2. Amen, 4. Shiner,  
5. Alaka, 6. Satan, 9. Putet,  
10. Tembar, 11. Tatok,  
12. Amang, 14. Jala.

**KHEN SHISADANGDI****AROGO TENZÜKERTEM MEETING**

**Mendenbuba :** Tenzükertem, takümba Arogo wadang jendi kar, anungji koba tama inyaktsü koba tesü inyaktsü aser shirnoki sen bushitsü lemsatepdi, ano Arogo inti revival lir, aser Arogotsür seminara lir Youth revival-a lir, yamaji tanüla anir Aruba mapa aika lir, item ajak khuret lemsatepdi.

**Tenzüker 1 :** Mezüngbuba nung staff quarter ya renematokdi, aji ta asünungdang asenok sodi maludangsa kiji renemra longpak zülü nungji asen tenünga aitsüato !

**Tenzüker 2 :** Ashirdangashi tamasa tanüla anir Aruba mapa ya inyakatokdi arungma! Mesüra Tsüngrem tsüngdang asenok sentsü asütsü,

**Tenzüker 3 :** Hai! Revivala ta seminara ta crusade itemjibo kümshia inyaka arur masüna? Metsü tsüngküm mapangbo jangjanglyuang aser pako ozütemji kümshia atutsüsa nungkoda!

**Tanungba tenzükertem :** Aito, to, to, too!!

**Mendenbuba:** Auni asenok ya Tsüngrem tenzüker masü Arogo tenzükemani,

**Lilir: I. Kilang Ajem, Indisen, Dimapur.**

**Assam police-i cyber criminals 5 apu; Rs 2 crore ashioktsü**

Morigaon, September 4, 2024

**(Agencies):** Assam nung nisungtem ket nungi Rs 2 crores tashi ashiokja agirtem Morigaon Police-i apu.

Additional Superintendent of Police (Crime), Samiran Baishya lenisüba kübok bushisüngdangba aruba sülen adianu ana dena temulung melemi bilemertem apu.

Parnok ya Rakibul Hoque (23), Imtiajul Hoque (18), Aftab Hussain (39), Dildar Hussain (33), aser Nekibur Rahman (30) nunger lir.

Parnok ajak Morigaon district nung alir aser parnok ket nungi laptops, mobile phones, ATM cards, aser taitsü aketba kulikakettem ngutetogo.

Morigaon Police-isa parnok

ket nungi Thar aser MG Hector garitem apu.

"Onoki adianu ana dena nisung pungu apu. Parnok ya tazüngertem dang lir aser nisung kabo Hyderabad nungi B.Pharm renemogo. Ano nisung ana tawa tu science stream nung 76% takok ngua liasü. Parnoki Kolkata nung tesentaktep yua lir" ta ASP (Crime) Samiran Baishya-i ashi.

Onoki iba ken o jungjunga bushisüngdanga aru aser yashi onoki mobile phones dena oset aika apu. Onoki itemji tending aser Imtiajul Hoque indang phone nungi credit card information amala osangtem agizük, ta pai ashi.

"Onoki bushitepa arudang credit card fraud kuli ngutet aser Axis Bank nungi loan app ka

sendaktepa lir. Onoki Thar aser MG Hector garitem puogo. Parnoki Rs 2 crores tashi ashioktsüogo. Account ka nung Rs 1 crore 17 lakhs anguba lir saka onoki iba account sota meyetet kechiyong senji Assam adena orr nungi yokba liasü" ta Baishya-isa ashi.

Parnoki rickshaw pullers aser aluyimertem dang nungi kulikakettem meshi aser itemji ajanga current accounts yanglu. Bangladesh-i aodang amshiba passport ka onoki ngutetogo. Onoki mobile phones 7, laptops 2, credit cards 12 aser gari ana puogo, ta paisa shisem.

Taküm July ita cyber fraudster Mohidul Islam apuba sülen Assam police-i ano nisung pungu apu.

Islam-i taila kulikakettem amshia Piramal Company nungi Rs 5 lakh loan angu aser iba ajanga Northeast nung cybercrime kanga bulua inyakba kuli agütsür.

Morigaon Police-i ASP (Crime) Samiran Baishya lenisüba kübok cybercrime anema mapa inyaka arur aser ozüing alema inyakertem aputsü aser public kümzüka ayutsü atema parnoki inyaker.

**JUBILEE MEMORIAL SCHOOL Mokokchung: Nagaland**

Affiliated to CISCE/ Affiliation No. NA001

**Applications are invited for the post of Principal**

**Requisite Qualifications:** Post graduation with B. Ed. and minimum of 5 years of teaching experience (Additional administrative experience in schools will be preferred).

**Age limit:** 40 years as on 31st Dec. 2024.

**Pay Package:** Upto ₹8.4 lakhs per annum with free accommodation, child education fees waiver and attached school vehicle. (Additional allowances may be considered based on experience and qualifications).

Eligible candidates may refer the school website [www.jubileememorialschool.edu.in](http://www.jubileememorialschool.edu.in) for application form. Last date of application form submission is **28th September 2024**.

Only shortlisted candidates will be called for interview.

GOVERNMENT OF NAGALAND  
DIRECTORATE OF HIGHER EDUCATION  
NAGALAND: KOHIMA.

NO.HED/SCHO/2022-23/

Dated, Kohima, the 4th Sept. 2024

**OPENING OF SCHOLARSHIP PORTAL FOR THE ACADEMIC SESSION 2024-25 UNDER THE DIRECTORATE OF HIGHER EDUCATION, NAGALAND, KOHIMA.**

- SCHEDULE FOR POST MATRIC ST SCHOLARSHIP  
Scheme opening date: 6-09-2024  
Scheme closing date: 24-11-2024  
Defective application verification closing date: 20-12-2024  
Institute verification closing date: 20-12-2024  
Portal: National Scholarship Portal (NSP) i.e. <https://scholarships.gov.in>
- NEC-MERIT SCHOLARSHIP, UNDER NORTH EAST COUNCIL (NEC), DONER.  
Scheme Open till: 31-10-2024  
Defective application verification closing date: 15-11-2024  
Institute verification closing date: 20-12-2024; 15-11-2024  
Portal: National Scholarship Portal (NSP) i.e. <https://scholarships.gov.in>  
Instruction: One-time registration (OTR) will be required to apply for any scholarship scheme on the NSP.
- NATIONAL SCHOLARSHIP FOR POST GRADUATE STUDIES UNDER UGC  
Scheme Open till: 31-10-2024  
Defective Application Verification Open till: 15-11-2024  
Institute Verification Open till: 15-11-2024  
Portal: National Scholarship Portal (NSP) - <https://scholarships.gov.in>
- ISHAN UDAY SPECIAL SCHOLARSHIP SCHEME FOR NORTH EAST REGION UNDER UGC  
Scheme Open till: 31-10-2024  
Defective Application Verification Open till: 15-11-2024  
Institute Verification Open till: 15-11-2024  
Portal: National Scholarship Portal (NSP) - <https://scholarships.gov.in>
- SCHEDULE FOR STATE MERIT & RESEARCH SCHOLARSHIP  
Scheme opening date: 2-09-2024  
Scheme Open till: 31-10-2024  
Last date for Institution verification within Nagaland: 30-11-2024  
Hardcopy submission for students studying outside the State: 30-11-2024  
Portal: Common Scholarship Portal i.e. <https://scholarship.nagaland.gov.in>

Sd/-  
(V. LOVITOLY SEMA), NCS  
Jt. Secretary, H&TE Department &  
Ex-Officio Director  
Higher Education  
Nagaland: Kohima



# Myanmar military-i telungpur telok 3 kiralongrar kümütsüogo

**Yangon, Rongjui/September 4 (Agencies):** Myanmar military sorkari telungpur telok asem kiralongrar telok kümütsüogo. Item telungpurtem yagi taoba küm ishika tsungda Myanmar north aser west len tesem aika atsüogogo.

September 2 nü sorkari Myanmar National Democratic Alliance Army (MNDAA), Ta'ang National Liberation Army (TNLA) aser Arakan Army ya kiralongrar teloktem ta sangdongogo, ta state meyong Global New Light of Myanmar-i Bodhbarnü sangdong ka ajanga metetdaksü.

Anti-Terror Law kübok kiralongrar ta jatsür aliba telok nung züngoksemba aser tesendaktep ayuba ya ozüng alema lir aser iba atema tenokdangba agütsüogo.

“Shirnoki item kiralongrartem den sendakteptir parnok ya kiralongrara inyakym nung

densemer kaka akümütsü,” ta military indang State Administration Council (SAC), tekolakba Senior General Min Aung Hlaing-i ashi.

Iba telungpur telok asem ya taoba küm tatemlen longjem aser parnoki Myanmar kübok tesem balala nung military atsüngtoktsü atema jenjang agia arudar.

Telok asem nungi sepaitemi China aser Thailand den artsülen military-i azüoker aliba tesem aika atsünga odar. Kasa mapang nung conflict research firm Crisis Group-i ashiba agi, western Rakhine state nung August ita tatem tashi nung Arakan Army-i tesem timba ka azüokogo, kong nütsünyongsük million ka shi lir.

Nüburtemi tentetba People’s Defence Forces (PDFs) puria military den rara arudar aser parnoki central Mandalay region nung takok tajung ngua arudar.

Nüburtemi longkak aitiba

anema military-i telangzüba tesashi agütsüba sülen PDFs ya 2021 küm National Unity Government (NUG)-i amenokja liasü.

SAC-i, 2021 küm May ita NUG ya kiralongrar telok ka ta sangdongogo. Kasa mapang nung NUG-ia military ya kiralongrar telok ka ta shia arudar.

Arakan Army ya military ama meimchir temeden anema inyaksangshiba atema aija lir, aser parnok ya Aung San Suu Kyi-i aniba sorkari kiralongrar telok ka ta sangdonger liasü.

Ajisüaka military-i sorkar atsüngba sülen iba designation ya agintsü aser ashiba agi, iba telok yagi yimjung amenoktsü atema teyari agütsüdar.

Assistance Association for Political Prisoners-i ashiba agi, military-i sorkar atsüngba sülen Myanmar nung nisung 5,599 dak tema tepsetogo aser nisung 20,000 dak tema tepuokdak yua lir.

# Pelaba Lemsateper

Tawa NPSC ajanga agiba Personnel and Administrative reform Department kübok EAC (Cl-I Gazetted Junior Grade) nung Sb. Temshimeren Longkumer, Wb. Taliwapang Longkumer aser Dr. Atemla Tinu na jabaso-i takok tulu ngua Longsati Longkumer kidong nem tenüngsang tulu bener arutsü nung kidongi kanga pelaba lemsateper.

Ne wadang ajak nung Tsüngrem-i len aniang ta kidongi sarasademtsür.



**Sd/-**  
**Meyisupong Longkumer**  
**President**  
**Longsati Longkumer Kidong, Mokochung**

**Sd/-**  
**Supongmar Longkumer**  
**General Secretary**

# North Korea nung ketdangsür 30 nem tasüba temerenshi agütsü

**Pyongyang, Rongjui/Sept. 04 (Agencies):** Nisung 1,000 takum samaba tüzümsüng aser alinen menokdangtetba atema North Korea lenir Kim Jong-Un-i ketdangsür 30 nem tasüba temerenshi agütsütsü temerenshi agütsü.

Ochimashi mapa inyakba aser pei mapa shidak meinyakba nung tai tonglokja alir lenir 20 nungi 30 tsüngta nem tasüba temerenshi agütsüogo, ta North Korean ketdangsür kati TV Chosun dang ashi.

Iba mesük taoba ita kasa mapang tüzümsüng agi kongshir aliba tesem nunga ketdangsür 20 nungi 30 tsüngta nem tasüba temerenshi agütsü, ta ketdangsüri television network dang ashi.

Taoba mapang Kim-i ketdangsürtem dang tüzümsüng aser alinen ajanga nisung aika takum samaba den nisung 15,000 dak tema pei ki yutsür tesem balala nung prokshitsüsa akumba atema ketdangsür merenshitsu totuyuba agüja liasü, ta North Korean Central News Agency (KCNA) ajanga ashi.

Tzünglu kanga sashia aruba ajanga arütsülen Sinuiju yimti aser North Phyongan Province kübok Uiju County nung tüzümsüng agi nisung aliba ki 4,100, alu acres 7,410 aser nüburtemi amshiba ki o jen,

lenmang aser railway metsüngbanga liasü, ta KCNA ajanga ashi.

Iba lendong nung asürtem mesüra samartem ya 1,000 dak tema alitsü, ta South Korean media outlets temi ashir.

Tawa Kim-i Uiju County semdang aser tüzümsüng agi kongshia alirtem ajurua teyari agüja liasü, ta KCNA ajanga ashi.

Iba mapang South Korean media ajanga North Korea nung tüzümsüng agi teraksa tulu agütsü ta osang sangdongba aija olulu prokshir ta shia liasü.

North Korea nem China, Russia aser South Korea-ia teyari agütsütsü ashi, saka Kim-i teyari magizük.

Tzünglu ajanga teraksa agüja aliba atema Russia Tir Vladimir Putin-i teyari agütsütsü ashiba atema Kim-i pelaba lemsatepdang pai nüngdakba mapang teyari meshitsu ta ashi.

Renema aliba sentong amshia teyari mapa inyaksü North Korea sentong lir ta pai ashi.

North Korea nung COVID-19 pandemic sülen nüburtem nem tasüba temerenshi agütsüba tali akumer. Pandemic marudang küm nung public executions ya 10 shi dang liasü, saka iba sülen küm nung 100 ajunger, ta Korean Times ajanga ashir.

# Venezuela nung opposition candidate aputsü tuyu



**Caracas, Rongjui/September 4 (Agencies):** Venezuela nung obendanger kati tawa linük tir election nung toktepba opposition candidate Edmundo González aputsü atema tetuyuba agütsüogo.

Public prosecutor indang office-i temepeshiba ka agütsüba sülen iba tetuyuba ya agüja liasü.

July ita election ya Maduro-i akok ta linük electoral council-i sangdongogo, kong sorkar pusemertem agi sünga lir.

Ajisüaka Maduro-i takok anguba indang sorkari tang tashi kecha kuli agüja mali aser kasa mapang nung opposition-i ashiba agi, parnok indang polling data ajanga González-i election ayong ayonga akokba sayur.

Venezuela nung public prosecutor indang office nungi temepishiba agizükba sülen obendanger Edward Briceño, shibai Venezuela nung kiralongrara dak sendakba nung ken o tem obendanger pai, temepishiba ya agizüka González aputsü atema tetuyuba agüja liasü.

“Linük nung shinga temzüng ozüng aser institutions tema nung mali,” ta Tir Maduro-i pa indang weekly television programme nung ashiba AFP news agency-i metetdaksü.

Linük nung ita ishika

tejakdang tir election agiba mapang González ya Maduro den toktepa liasü. Election tembangba sülen pai aniba opposition party temi online nung voting data tem sangdonga arudar aser iba ajanga pai shilem 30 dak tema agi election akokba sayuogo. Iba data sangdongba ajanga pa aputsü tetuyuba agütsüogo.

Pa ya, ozüng alema inyaksangshiba, document falsification, sorkar tashi mangatsü atema rongmesoba

aser inyakym minprongba atema aitsüogo, ta public prosecutor-i ashi.

González, shiba election tembangba sülen atsüka lir pai inyakym kecha nunga aibelena mali ta shiogo.

European Union-ia, July ita election ya Maduro-i kokogo ta magizüker aser Latin American leniktem aikatia pa pu mesemi arudar, kong Brazil Tir Lula-ia Venezuela sorkari ochishi inyaksü ayongzükogo.

Kasa mapang nung US-ibo, González-i election kokogo ta shia arudar aser ashiba agi, Maduro tamakok anguba kuli aika lir.

Ajisüaka sorkari azüoka aliba National Electoral Council-i, Tir Maduro-i election kokogo ta sangdong aser iba ajanga Venezuela ajunga nung nüburtemi longkak aita liasü.

Election tembangba sülen Tir Maduro-i aniba sorkari nisung 2,400 dak tema puogo.

# Ukraine anüdoklen nisung tenet tepset

**Kyiv, Rongjui/Sept. 04 (Agencies):** Ukraine anüolen Lviv yimti nung Russia nungeri amakdang tetsü ka aser lar jala asem densema nisung tenet asü. Kinü tanu ka aser ano tetsürchanu ka tepset, ta ketdangsür temi ashi.

Russia-i Bodhbarnep drones aser hypersonic missiles amshia amak, ta Lviv Mayor Andriy Sadovy-i ashi.

Taküm Russia-i bomb amshia tesashitiba maka linük tiyonglen Poltava yimti nung military institute ka amakdang nisung 53 asü Ukraine nungertem timtema alidang ano Bodhbarnü amakba osang ya angashir.

Linük yimtiba Kyiv nunga Bodhbarnü ola tulu adoka apokba angashi, kong air defences ajanga Russian missiles dak tenük yoka liasü. Kryvyv Rih nung hotel ka aser anasa ki ka nung missile khaloktsüba nung nisung pongu yirua liasü.

Ukraine tesem ajungalen air raid alert agüja aliba mapang Ukraine anüolen Lviv yimti nungya amak.

Iba yimti nungya anepdang 5:40 ako meta amak ta ashir.

Russia indang defence ministry-ia Lviv nung aliba Ukrainian defence industry facilities nung Kinzhal hypersonic weapons

khaloktsüogo aser tenük yokba tesem ajak nung kongshi ta ashi.

Ajisüaka Sadovy-i ashiba agi, Russia-i amakba nung Lviv yimti tiyong nung ki 50 dak tema raksatsüogo aser yangji nisung aliba ki, school aser clinic tem densema lir.

Pai social media nung kibong ka indang noksa lemsatepba nung tebu dang takum kumzük ta ashi. Pa kinungtsü Yevgenia aser par jala asem – Darina, Emilia aser arishi küm 21 tain Yaryana – parnok ajak pei kidang asü, ta ashi.

Russia-i missiles 13 aser drones 29 khaloktsüba nungi cruise missiles tenet aser drones 22 khazüka yok, ta

Ukrainian air force-i ashi.

Küm ana ser tesadang raraba mapang Lviv yimti nung kangabo mokongshi liasü, saka taoba hopta Russia-i energy infrastructure nung tenük yoker amakba ajanga power raksatsü, ta ketdangsürtemi ashi.

Tir Volodymyr Zelensky-i par anüolen tembar linüktem dang Russia dak khaloktsütsü atema long-range weapons tem maneni meshir.

Poltava nung Russia-i amakdang nisung 271 yiru ta ketdangsür temi ashi aser Bodhbar nikongdang tashinung nisung 400 nem azü agütsür liasü.



## Paris Paralympics: Khilari-i shot put asaya nung silver medal angu



Rongjui/September 4, 2024

(Agencies): Tang asaya aliba Paris Paralympics 2024 nung India nung asayartemi maneni kanga junga asaya, Bodhbarnü Sachin Sarjerao Khilari-i, tebur shot put F46 asaya nung silver medal ka nguogo. Pai yimdem 16.32m merepa Asian record ka yanglua liasü.

Khilari ya Maharashtra nung Sangli district kübok Karagani yimtsüng nung aluyimer kibong ka nung aso. Arishi küm 34 tain asayar yagi yindem tanabenbuba merepba mapang pai yanglur aliba Asian

record (16.30m) ajateta liasü. May ita Japan nung World Para-Athletics Championships asayaba mapang pai iba otsü tasen yanglu aser gold medal nua liasü.

Iba asaya nung Canada nungi Greg Stewart-i (16.38m) pa indang Tokyo Paralympic gold defend süa gold medal angu aser Croatia nung asayar Luka Bakovic-i (16.27m) bronze medal nua liasü.

Khilari-i silver medal ka anguba ya tang asaya aliba asayamung nung para-athletic

temi medal 11buba anguba liasü. Paisa, taoba küm China nung Asian Para Games asayaba mapang gold medal ngur lir.

Khilari ya school azünga mapang accident ka nung densembe sülen teka tabelen telemta aküm. Pa 2015 küm nungi para Sports nung shilem agi tenzük aser 2017 küm jaipur nung national games asayaba mapang pai gold medal nua liasü.

Asaya nung dang takok nua asayaba masü Khilari ya kaket shisatsü bushiba nunga takok tajung anguba nisung ka lir aser pa mechanical engineer ka lir. Pa institutions balala nung visiting faculty ama inyaker aser kaketshirtem MPSC aser UPSC tatidang atema renemshitsü asoshi teyari agüja arudar.

Sachin tanur asü dang tetsü süatok aser bicycle tsükokba lendong ka nung pa teka telemta aküm. Surgery aika agiaka pa teka taneptsü monguteti liasü.

## US Open: Frances Tiafoe aser Taylor Fritz na semi asayatsü

Rongjui/September 4, 2024

(Agencies): Tang asaya aliba US Open tebur kija asaya nung Frances Tiafoe-i Grigor Dimitrov akokba sülen pa Taylor Fritz den semifinal asayatsü, koba küm 18 tsüngda America nung ana mezüngbuba semifinal asayaba asütsü.

Quarter final asaya nung Grigor Dimitrov tasembuba set nung yirua set pezübuba nung masayatetsüsa akümba sülen Tiafoe-i iba asaya 6-3, 6-7 (5/7), 6-3, 4-1 agi koka liasü.

Tiafoe-i 2022 kuma iba asayamung semifinal tonga asayaago, ajisüiaka Fritz bo tang mezüngbuba Grand Slam semifinal ka tongtetogo. Quarter final asaya nung pai fourth-ranked Alexander Zverev 7-6 (7/2), 3-6, 6-4, 7-6 (7/3) agi koka liasü.

Arishi küm 33 tain Dimitrov shiba 2019 küm sülen tang mezüngbuba US Open semifinal nung asaya liasü, pa set tasembuba asayaba mapang yirua temang anepalutsü atema court toktsür aotsüsa aküm.

Bulgaria nung asayar ya temang anepaluba sülen meyipa aru, saka masayateti kuma set pezübuba nung anenadok.

"Semifinal-i aiba atema pelar saka ni yamabo mekoknüi liasü," ta Tiafoe-i ashi.

"Asaya temaba jenjang nung

toktepa asaya liasü. Nenoki ni tanga America nung ka den asayaba angutsü, koba jangrademtsüka asütsü. Iba asaya ya kuma indang career nung tongtibangtiba asayatsü asütsü. Kuma arishi küm 14 asü dang nungi metettepa lir.

America nung rongnungi Andy Roddick-i tatemsa Grand Slam ka koka lir. Pai 2003 küm US Open koka liasü.

Kasa mapang nung pa ya America nung rongnungi New York nung final tonga asayaba tesüsabuba asayar lir. 2006 küm US Open nung pa final tonga atu saka Roger Federer-i tsükdaksü.

Andre Agassi aser Robby Ginepri na 2005 US Open nung semifinal asayaba sülen Hokolbarnü Tiafoe aser Fritz na semi-final asayatsü aliba ya America nung asayar ana iba asayamung nung semifinal asayaba mezüngbuba asütsü.

Asaya nung Tiafoe-i, Dimitrov indang serve break süa pa 3-2 agi tejakdang aküm aser iba sülen asaya koka liasü.

Tanabuba set nunga America nung asayar ya 3-1 agi tejakdang liasü, saka Dimitrov-i kanga meranga asayar 6-7 (5/7) agi asaya akok.

Iba sülen set tasembuba aser pezübuba Tiafoe-i koka pa semifinal tongtetogo.

## Foden, Palmer & Watkins England squad nung mezüngok



Phil Foden



Cole Palmer



Ollie Watkins

Rongjui/September 4, 2024

(Agencies): Phil Foden, Cole Palmer aser Ollie Watkins nung taruba Nations League asayamung atema England squad nung züngoksema mali.

Manchester City forward Foden, shibai tawa PFA Player of the Year naroküm agizükogo, pa interim England boss Lee Carsley-i jaok, saka temang nung timtem aliba ajanga team nungi masayatetsüsa kümogo.

Chelsea forward Palmer aser Aston Villa striker Watkins nata St George's Park-i team nung adentsü atema aru, saka tena temang nungi timtem aliba anepalutsü atema pei club-i meyipaago, ta Football Association-i metetdaksü.

Nations League nung England team September 7, Honibarnü Dublin nung asayatsü aser iba sülen anogo asem lir kidang Wembley nung Finland den asayatsü renemdar.

July 14 nü Euro 2024 final nung Spain makokba sülen England team tang

mezüngbuba asayatsü atema renemdar.

Euro final nung tamakok anguba sülen Gareth Southgate-i England team coach mapa toktsü aser pa melena August 9 nü England under-21 team coach Carsley, interim manager asütsü shimogo.

Nations League asayamung atema team sangdongba mapang Carsley-i, Angel Gomes, Tino Livramento, Morgan Gibbs-White aser Noni Madueke nungera jaokogo.

Lille winger Gomes, Newcastle defender Livramento, Nottingham Forest midfielder Gibbs-White aser Chelsea forward Madueke nung ajak ya Carsley England Under-21 manager asüba mapang pa kübok asayaago.

Manchester City playmaker Jack Grealish shiba, England indang preliminary Euro 2024 squad nung mezüngoksema liasü, pa team nung tanaben züngoksemogo aser Manchester United defender Harry Maguire-a team nung

dena lir.

### England squad

**Goalkeepers:** Dean Henderson (Crystal Palace), Jordan Pickford (Everton), Nick Pope (Newcastle United)

**Defenders:** Trent Alexander-Arnold (Liverpool), Levi Colwill (Chelsea), Marc Guehi (Crystal Palace), Ezri Konsa (Aston Villa), Rico Lewis (Manchester City), Tino Livramento (Newcastle United), Harry Maguire (Manchester United), John Stones (Manchester City)

**Midfielders:** Conor Gallagher (Atletico Madrid), Morgan Gibbs-White (Nottingham Forest), Angel Gomes (Lille), Kobbie Mainoo (Manchester United), Declan Rice (Arsenal).

**Forwards:** Jarrod Bowen (West Ham United), Eberechi Eze (Crystal Palace), Anthony Gordon (Newcastle United), Jack Grealish (Manchester City), Harry Kane (Bayern Munich), Noni Madueke (Chelsea), Bukayo Saka (Arsenal).

## Chris Smalling Al-Fayha nung denogo

Rongjui/September 4, 2024

(Agencies): Taoba mapang England nung defender Chris Smalling, Roma nung season pongu asayaba sülen Saudi Arabian club Al-Fayha nung oa denogo.

Arishi küküm 24 tain sayar yagi küm ana atema tenangzüktepa yangluogo, ta Al-Fayha-i sangdong ka ajanga metetdaksü.

Roma-isa, arishi küm 19 tain Brazil nung winger Joao Costa, ano Saudi Arabian club Al-Ettifaq dang teti atema yokogo.

Costa, Roma nungi Serie A aser Europa League nung ponguben dang asaya liasü.

2022 küm mezüngbuba Europa Conference League akokba Roma team nung Smalling ya tongtibang asayar ka liasü.

2011 küm nungi 2017 küm tashi nung pa England team nungia 31 ben asayaago.

Küm ka ana tsüngda contract tajung agüja Cristiano Ronaldo aser Neymar nung



amala nungtugu asayatem anir aoba sülen takümbo Saudi league-i temaba jenjang nung asayaba international asayatem atsür motet.

Victor Osimhen Saudi league-i aotsü ta bilema liasü, ajisüiaka Al-Ahli puri transfer window tatembangbuba anogo Brentford nungi Ivan Toney anir ao. Toney-i iba Premier League club den tenangzüktepa ka meyangluteti liasü.

Kasa mapang nung Osimhen, Mongolbarnü loan nung Galatasaray-i ogo.

## BILEMDANGANG

"Meimchir shisatsü ajak ojang ana - atasaba aser teimla nung atemer."